



Broj: 01/1-50-1-1-59/08  
Sarajevo, 22.12.2008. godine

## Z A P I S N I K

### 59. sjednice Ustavnopravne komisije

Sjednica je održana 22. 12. 2008. , s početkom u 12 sati.

Sjednici su prisustvovali članovi Komisije: Šefik Džaferović, Velimir Jukić, Lazar Prodanović, Ekrem Ajanović, Momčilo Novaković, Halid Genjac, Drago Kalabić i Adem Huskić.

Osim članova Komisije, sjednici su prisustvovali predstavnici: Agencije za sigurnost hrane BiH Sejad Mačkić, Zoran Đerić, Asija Leto, Ministarstva za ljudska prava i izbjeglice BiH Amela Hasić, Komisije za vanjsku trgovinu i carine Emira Češljarić i Radomir Marjanović, Ministarstva komunikacija i prometa BiH Zahida Hurtić Strika, OHR-a Jelena Despot, OSCE-a Amra Zorlak, te Sektora za odnose s javnošću PSBiH Zoran Brkić.

Sjednici su prisustvovali sekretar Komisije Igor Bajić i stručni saradnik u Komisiji Nedžad Salman.

Komisija je jednoglasno usvojila sljedeći

### D N E V N I R E D

1. Usvajanje Zapisnika 58. sjednice Komisije, održane 15.12.2008.;
2. Prijedlog zakona o Budžetu institucija BiH i međunarodnih obaveza BiH za 2009. godinu, predlagač: Predsjedništvo BiH (**usklađenost sa Ustavom BiH i pravnim sistemom u skladu s članom 103. Poslovnika Doma**);
3. Prijedlog zakona o unutrašnjoj i pomorskoj plovidbi, predlagač: Vijeće ministara BiH (**usklađenost sa Ustavom BiH i pravnim sistemom u skladu s članom 103. Poslovnika Doma**);
4. Prijedlog zakona o genetski modificiranim organizmima, predlagač: Vijeće ministara BiH (**postupak u nadležnoj komisiji u skladu sa zaključkom Doma**);
5. Prijedlog zakona o državnoj imovini BiH, predlagač: poslanik Sadik Bahtić (**usklađenost sa Ustavom BiH, pravnim sistemom i principima u skladu s članom 103. i 104. Poslovnika Doma**);
6. Ostala pitanja:
  - Zahtjev za autentičnim tumačenjem člana 7. tačka 2 a) Zakona o slobodnim zonama BiH ("Službeni glasnik BiH", br. 3/02 i 13/03), podnosilac zahtjeva: Federalno ministarstvo trgovine (**razmatranje zahtjeva u skladu s članom 137.stav (4) i (6) Poslovnika Doma**);
  - Akt Ministarstva za ljudska prava i izbjeglice BiH, broj: 08-05-4411-1/08, od 13.11.2008. (**razmatranje zahtjeva u skladu s članom 41.stav (2) Poslovnika Doma**).

**Ad.1. Usvajanje Zapisnika 58. sjednice Komisije, održane 15.12.2008.**

S obzirom da nije bilo rasprave, Komisija je jednoglasno usvojila Zapisnik 58. sjednice.

**Ad.2. Prijedlog zakona o Budžetu institucija BiH i međunarodnih obaveza BiH za 2009. godinu, predlagač: Predsjedništvo BiH (usklađenost sa Ustavom BiH i pravnim sistemom u skladu s članom 103. Poslovnika Doma)**

Nakon rasprave, Komisija je jednoglasno utvrdila da:

- postoji valjan ustavnopravni osnov za donošenje Zakona;
- je Prijedlog zakona usklađen sa Ustavom BiH i pravnim sistemom.

**Ad.3. Prijedlog zakona o unutrašnjoj i pomorskoj plovidbi, predlagač: Vijeće ministara BiH (usklađenost sa Ustavom BiH i pravnim sistemom u skladu s članom 103. Poslovnika Doma)**

Predsjedavajući je otvorio raspravu u kojoj su učestvovali članovi Komisije Momčilo Novaković i Lazar Prodanović.

Nakon rasprave, Komisija je, s pet glasova „za“, dva glasa „protiv“ i bez „suzdržanih“ glasova, utvrdila da:

- postoji valjan ustavnopravni osnov za donošenje Zakona;
- je Prijedlog zakona usklađen sa Ustavom BiH i pravnim sistemom.

**Ad.4. Prijedlog zakona o genetski modificiranim organizmima, predlagač: Vijeće ministara BiH (postupak u nadležnoj komisiji u skladu sa zaključkom Doma)**

Predsjedavajući je otvorio raspravu u kojoj su učestvovali svi prisutni članovi Komisije i predstavnici Agencije za sigurnost hrane BiH.

Komisija je nakon rasprave, sa sedam glasova „za“, bez glasova „protiv“ i jednim „suzdržanim“ glasom, usvojila amandman I. koji glasi:

**Amandman I.**

Član 3. mijenja se i glasi:

**„Član 3.**

**(Nadležni organi)**

(1) U smislu ovog zakona, nadležni organi su: Agencija za sigurnost hrane BiH (u daljnjem tekstu: Agencija), Ured za veterinarstvo BiH, Uprava BiH za zaštitu zdravlja bilja i organi entiteta, kantona i Brčko Distrikta BiH nadležni za oblast poljoprivrede, šumarstva i vodoprivrede, oblasti zdravstva i zaštite okoliša.

(2) Za provođenje ovog zakona, u slučaju kada se GMO i/ili proizvodi koji sadrže i/ili se sastoje i/ili potiču od GMO-a:

a) ograničeno upotrebljavaju u kontroliranom zatvorenom sistemu, nadležna su entitetska ministarstva nadležna za pitanja nauke uz saglasnost organa entiteta, kantona i Brčko Distrikta BiH nadležnih za oblast poljoprivrede, šumarstva i vodoprivrede i mišljenja ostalih nadležnih organa;

b) stavljaju na tržište:

1) kao hrana ili hrana za životinje, nadležna je Agencija uz prethodno pribavljeno mišljenje nadležnih organa;

2) kao reprodukcionni materijal u poljoprivredi i šumarstvu ili kao sredstva za zaštitu bilja, nadležna je Uprava BiH za zaštitu zdravlja bilja uz saglasnost organa entiteta, kantona i Brčko Distrikta BiH nadležnih za oblast poljoprivrede, šumarstva i vodoprivrede;

3) kao lijekovi ili reprodukcionni materijal u veterinarstvu, nadležan je Ured za veterinarstvo BiH uz prethodno pribavljeno mišljenje nadležnih organa;

4) prilikom upotrebe GMO-a i/ili proizvoda koji sadrže i/ili se sastoje i/ili potiču od GMO-a u kozmetici, farmaciji ili zdravstvenoj zaštiti ljudi, nadležna su entitetska ministarstva zdravstva i Brčko Distrikta BiH uz prethodno pribavljeno mišljenje nadležnih organa;

5) za inspekcijski nadzor označavanja u prometu GMO-a i/ili proizvoda koji sadrže i/ili se sastoje i/ili potiču od GMO-a, nadležne su entitetske uprave za inspekcijske poslove, kantonalne inspekcije, inspekcije u okviru lokalnih organa uprave i Inspektorat Vlade Brčko Distrikta BiH.

(3) Nadležni organi iz st. (1) i (2) ovog člana provodit će službene kontrole, inspekcijski i upravni nadzor u skladu s važećim zakonskim propisima u Bosni i Hercegovini, entitetima i Brčko Distriktu BiH. Nadležni organi dužni su da međusobno sarađuju. Naučno-stručno tijelo osnovano u skladu s ovim zakonom dužno je nadležnim organima uprave iz st. (1) i (2) ovog člana pružiti stručnu pomoć u provođenju ovog zakona.

(4) Agencija je centralno i koordinaciono tijelo za obavljanje stručnih poslova u vezi sa GMO-om.“

Komisija je nakon rasprave jednoglasno usvojila amandman II. koji glasi:

#### **Amandman II.**

Član 55. mijenja se i glasi:

#### **„Član 55.**

#### **(Vijeće za GMO)**

(1) Radi praćenja stanja i razvoja u oblasti rukovanja GMO-om i pružanja stručne pomoći nadležnim organima u provođenju ovog zakona, Vijeće ministara BiH, na prijedlog Agencije, s liste kandidata iz naučnih, stručnih i obrazovnih institucija iz entiteta i Brčko Distrikta BiH, odlukom bira Vijeće za GMO (u daljnjem tekstu: Vijeće) na period od četiri godine, s tim da mogu biti imenovani na još jedan mandat.

(2) Vijeće ima sedam članova, koji se biraju isključivo između eminentnih naučnika i stručnjaka iz oblasti mikrobiologije, genetike, medicine, veterinarske medicine, biohemije, molekularne biologije, farmacije, biotehnologije, poljoprivrede, šumarstva, prava, zaštite na radu, zaštite prirode i zaštite okoliša, vodeći računa o ravnopravnoj zastupljenosti svih naroda i odgovarajućoj zastupljenosti entiteta i Brčko Distrikta BiH.

(3) Vijeće među svojim članovima bira predsjednika i njegovog zamjenika. Vijeće je samostalno i nezavisno tijelo i njegov rad je javan. Vijeće odlučuje većinom glasova, koja uključuje najmanje po jednog predstavnika svakog entiteta i svakog konstitutivnog naroda.

(4) Vijeće donosi poslovnik kojim uređuje način rada.

(5) Sredstva za rad Vijeća i obavljanje stručno-administrativnih poslova osiguravaju se u Budžetu institucija Bosne i Hercegovine.

(6) Članovi Vijeća za GMO na mogu biti zaposleni u nadležnim organima.“

Predsjedavajući je predložio, a Komisija jednoglasno prihvatila prijedlog da Agencija za sigurnost hrane BiH, zajedno s članovima Ustavnopravne komisije: Velimirom Jukićem, Lazarom Prodanovićem i Halidom Genjcem, pripremi tekst Prijedloga zakona koji bi sadržavao sve usvojene amandmane prema redoslijedu članova Zakona u skladu s navedenim izmjenama, uključujući i normativno tehničke ispravke koje se moraju sačiniti.

#### **Ad.5. Prijedlog zakona o državnoj imovini BiH, predlagач: poslanik Sadik Bahtić (usklađenost sa Ustavom BiH, pravnim sistemom i principi u skladu s članom 103. i 104. Poslovnika Doma)**

Predsjedavajući je otvorio raspravu u kojoj su učestvovali članovi Komisije Momčilo Novaković i Ekrem Ajanović.

Nakon rasprave, Komisija je, sa četiri glasa „za“, jednim glasom „protiv“ i dva „suzdržana“, utvrdila da:

- postoji valjan ustavnopravni osnov za donošenje Zakona;
- je Prijedlog zakona usklađen sa Ustavom BiH i pravnim sistemom.

Komisija je, sa četiri glasa „za“, tri glasa „protiv“ i bez „suzdržanih“ glasova, prihvatila principe Prijedloga zakona.

#### **Ad.6. Ostala pitanja:**

- **Zahtjev za autentičnim tumačenjem člana 7. tačka 2 a) Zakona o slobodnim zonama BiH ("Službeni glasnik BiH", br. 3/02 i 13/03), podnosilac zahtjeva: Federalno ministarstvo trgovine (razmatranje zahtjeva u skladu s članom 137.stav (4) i (6) Poslovnika Doma)**

Predsjedavajući je predložio, a Komisija jednoglasno prihvatila prijedlog predsjedavajućeg Komisije da se ova tačka dnevnog reda razmatra na sljedećoj zajedničkoj sjednici ustavnopravnih komisija.

- **Akt Ministarstva za ljudska prava i izbjeglice BiH, broj: 08-05-4411-1/08, od 13.11.2008. (razmatranje zahtjeva u skladu s članom 41.stav (2) Poslovnika Doma)**

Komisija je, sa sedam glasova „za“ bez glasova „protiv“ i jednim „suzdržanim“ glasom, zaključila da se navedeni akt uputi Kolegiju Predstavničkog doma radi informiranja i eventualnog preduzimanja aktivnosti iz nadležnosti Kolegija.

S obzirom da nije bilo više pitanja, sjednica je završena u 14 sati.

**SEKRETAR KOMISIJE**  
Igor Bajić

**PREDSJEDAVAJUĆI KOMISIJE**  
Šefik Džaferović